

萬

曆

疏

鈔

萬曆疏鈔卷七

臣道類

余懋學

釋羣疑懲積弊以明臣紀疏

陳璧

甄別大臣酌定去留以風臣節疏

趙標

上下嫌疑橫生乞申諭以昭臣節疏

汪若霖

主德日昭臣職宜恪疏

呂邦耀

臣工積弊乞申飭以保治安疏

王基洪

聖政維新臣職宜舉疏

沈鳳翔

聖政光輔在人臣節砥礪宜急疏

蕭淳

主上新政日隆臣下積弊未革疏

翁憲祥

撫按交代當嚴正郎出差非體疏

萬曆疏鈔卷七

臣道類

釋羣疑懲積蠹以明臣紀疏

余懋學

南京尚寶司卿
萬曆十三年

臣聞忠臣不私私臣不忠伏惟皇上躬上聖之資
秉好問之哲頃者徒步南郊召見輔臣卽成湯桑林
之虞帝舜勅天之義亦不是過此誠明良千載之遇
忠臣思奮之秋也及二三臣工不畏公議互相攻擊
虧國家之體傷天地之和臣竊傷之皇上有敬天

勤民之忱而諸臣無集思廣益之實 皇上有側身
修行之念而諸臣多淫朋比德之私 皇上以萬姓
之心爲心諸臣不能以皇上之心爲心諸臣角立
於下 皇上孤立於上可痛也亦可憾也夫蔡系周
孫愈賢途探李植永彤之惡而肆行排擊江東之羊
可立又預憂諸臣未然之禍而亟爲論奏植等旣指
諸臣爲邪諸臣又指植等爲邪是中隱微毫釐千里
然謂植等爲邪百人而百不信何者彼所除者君側
之惡所發者罔上之奸未有顯然之過而遽冒不韙

之名其論不足據也謂攻植等爲非邪百人而百不信何者彼所攻者爲國家除大奸者也爲天下誅亂賊者也今大奸尚未正法而植等先被惡名內之懷報復之私而外之來譏賊之口其亦有可疑也臣竊揆之諸臣與植等之不能相容其故有二其一張懋修王之鼎等冒竊科名考官陸檄嵇應科等相繼降謫人心稱快然自二三臣外同時典試諸臣聞有乘機通賄者亦有徇私用情者人言嘖嘖雖風聞未必盡實而彼輩不無疑畏此固疑也其二張居正奪情

之時大臣科道交章保留獨吳中行等奮不顧身以
明一時之大義正萬古之綱常今居正殛死而中行
等起用一時保留諸臣爲首者雖被斥罰而聯署者
寧無疑愧此豈疑也三疑蓄於中而百妬生於外倖
釁者因之以乘間速化者因之以構讒諸臣之隙愈
深而讒賊之口愈肆是非倒置賢否混淆此詩人所
致蒼蠅之刺而帝舜所以嚴殄行之聖也臣嘗以爲
君子之過如日月之食過也人皆見之更也人皆仰
之當嚴嵩濁政之時中外諸臣鮮不依阿澳忍以苟

富貴卽大學士徐階號爲賢者亦且唯唯奉承深自
結納後來當軸輔政舉嚴嵩之弊政而盡掃之舉嚴
嵩之弊人而盡更之世道人心翕然丕變故天下之
人俱稱階後日之功而忘其前日之失何也彼以爲
始之遷就其間者養其身以有待也後之撥亂反正
者奮其身以有爲也均之乎爲國之公心也居正擅
作威福壞亂綱常不有謬謬之直固無以伸大義於
一時不有唯唯之容亦無以幹元化於今日居者爲
社稷之守行者爲紀綱之僕人亦孰不諒其心之非

苟富貴而圖後功者今世道大明聖主獨斷則洗心
滌慮撥亂世而反之正此其時矣乃猶曉曉不置滄
訛成風異者曰居正之餘焰不可不盡滅也游七徐
爵之罪不可不亟正也同者又曰居正之簿錄已甚
爲之求增結也曾省吾之賊數太溢爲之求減追也
夫是非不兩立賞罰不並施居正省吾之功罪昭然
在天下處分在聖斷其屢言而不置者固爲深求其
違衆而稱寃者尤爲曲護前日之依違猶可言也今
日之曲護不可言也夫罪人未除無故而攻謫發之

臣後來誰復敢爲。陛下言事者建言諸臣一網打盡卽有一二偶遺亦安得不懷疑懼今日中外臣民皆曰馮保且復進也張居正之官職且復而其子且復起用也游七徐爵之罪且復脫也彼誠見近日之迹可疑而遂以爲信然此誠社稷安危之機天下治亂之判人心邪正之辨不可不早見而預待之者也。今江東之擢爲太僕少卿稍足以解四方之惑然吳中行之請假沈思孝之乞罷是非尚未別白則邪正安所適從自古未有薰蕕共器議論兩可以爲治者

是故欲正人心在明國是欲定羣議在釋羣疑臣以爲陛下今日宜渙發德音明詔在廷諸臣已往之愆不得深究將來之惡不可逾探諭李植等當居寵思危不得怠於宦成以隳晚節諭科道官當大心體物不得過於苛求以傷大體俾植等無疑於諸臣諸臣亦無疑於植等庶幾和氣薰蒸庶明勵翼都兪吁咈之盛不在唐虞而在今日廟堂之上矣夫威福自上則主勢尊衆言淆亂當折諸聖植等三臣陛下所親嘉其功而擢用之者也乃舉朝臣工百計嫉之

假令政府欲用一人諸臣詎敢與之爲忤乎臣見其
姻連肺腑身冒不韙而諸臣輒擬之爲王佐者以彼
視植其人品高下何如也詳於未定之人品而媚於
已著之奸惡輕於攻陛下之所用而重於薦政府
之所結此其心之公私邪正天下自有能辨之者方
今發言盈庭民聽滋惑惟陛下以大義斷之則一
言而民聽不惑國是大明詩曰君子如怒亂庶遄沮
君子如祉亂庶遄已此之謂也臣又惟天下之治亂
係庶官庶官之表率係朝廷今日庶官之蠹相沿有

十而貪酷不與焉臣請究言之書曰爾有嘉謀嘉猷則入告爾后於內爾乃順之於外曰斯謀斯猷惟我后之德古之道也今執政大臣一政之善輒引以爲輔導之功一事之失輒推以爲挽回之難其於善則稱君之義謂何此誣上之奸其蠹一也書曰天命有德天討有罪夫命討大政天子猶不敢自專而歸之於天而況人臣乎今中外臣寮一有進用執政則曰我所注意也銓曹則曰我所推轂也文選又曰我所推舉也受官公朝謝恩私室國典之謂何而因以爲

市此招權之弊其蠹二也孟子曰子路人告之以有
過則喜禹聞善言則拜陛下天縱神聖羣臣莫及
然且虛懷納諫有順無強言內操卽止內操言織造
卽減織造乃二三大寮稍有違言輒奮袂攘臂怒目
而視夫人非聖人孰能無過他山之石可以攻玉已
則不受善言而往往望明主之受諫何藏身之不
恕也此諱疾之失其蠹三也記曰進思盡忠退思補
過人臣之義要於以天下萬世之心處天下萬世之
事而已無與焉今中外臣工徃徃探上人之意向而

不顧公論之是非論人則愛者錄之憎者攻之行政則喜者舉之妨者罷之蓋自張居正當軸以來爲然而今日恬不之變此承望之私其蠹四也傳曰君子和而不同是故君所謂可而有否焉臣獻其否以成其可君所謂否而有可焉臣獻其可以替其否夫君命可否猶不可同而況臣下乎今當路有一主持則羣工轉相倡和上者惟予言而莫之違下者惟其言而莫之違不是者則羣訞及之上下比同具曰予聖蓋寧敢於忤天子之命而不敢於違大臣之言失今

不圖鼠將爲虎此雷同之弊其蠹五也書曰明四目
達四聰是以古者諫無常官我國家舊制亦許諸人
直言無隱近日部屬諸臣每有建白輒加沮抑一則
曰出位二則曰越俎沮天下忠臣之心長奸邪壅蔽
之漸此阻塞之奸其蠹六也孔子曰臣事君以忠又
曰勿欺也近自張居正擅權蒙蔽主聽道路以目
皇上毅然罪之宇內肅然生乎居正之後者可以戒
矣乃餘風未殄欺罔日滋如原任刑部尚書某者公
論不齒近日寔斥大快人心顧連章累牘爲之申雪

將謂日月之明可以一指蔽乎此欺罔之奸其蠹七也書曰同寅協恭和衷哉記曰爲人臣者無以有已已之爲害小之傷共濟之忠大之僨國家之事近日中外臣寮或大臣自相攻擊或言官互相詆排或南北交相齟齬始之以自用之私而終之以好勝之習好勝不已必致忿爭忿爭不已必致黨比唐之牛李宋之洛蜀其初豈不由一言之相失哉始之者一線而終之者滔天則勝心爲之也此爭勝之弊其蠹八也衰世好諛將由惡終臣先年建白末以此事爲防

迨于今十有二年而此風之滋日甚一日言及大臣
則誇伊傅之復生言及中貴則誇小心之翼翼言及
邊帥則誇召虎之復出言及有司則誇卓魯之再作
上之結歡於大臣而下之求媚於屬吏內之納交於
近侍而外之通賂於邊帥 陛下不觀張居正之在
事乎上書者不曰伊周則曰舜禹不曰精忠貫日則
曰純德格天乃今權奸逾黨唾罵不置彼一人之身
而忠逆乍異此無他由居正好諛而讜論不聞也假
令居正斥遠諛佞進用忠言則雖無舜禹之阿後亦

安得有奸相之罵哉殷鑒不遠巧言如簧

臣

恐後之

視今亦猶今之視昔此諛佞之弊其蠹九也孟子曰
所惡於智者爲其鑿也是故天下不患無喜事之臣
而患無任事之臣任事之臣智也喜事之臣鑿也今
兩京大臣固多老成却慮爲國遠猶然亦間有自負
時流勇於自見務建白以爲名高侵職掌而受詞狀
不思治有定體乖之則民慢政有常經拂之則民違
彼荆公之新法何嘗不曰利國利民哉卒之法行民
擾而荆公蒙不韙之名者則以拂經而乖體也而今

曰一、二大臣實似之。長告訐之風乖治理之常。其防不可不預也。此乖戾之失。其蠹十也。夫是十蠹者。雖不至如貪吏之浚民脂。酷吏之戕民命。然貪酷之害止於一方。十蠹之害流於天下。貪酷之禍顯而易見。十蠹之禍隱而難知。易見者稍知自愛。決有不爲。卽有犯者。國家猶得以官刑治之。若難知者。其心或私。其迹似公。卽賢人君子有不免誤以爲是。溺其中而不自覺焉。國家以爲賢人君子也。亦遂以其所爲爲是。而不加察。一倡羣和。上好下甚。其流之弊不至於

毒天下禍人心不止也記曰百官者萬民之表也大
臣者百官之倡也大臣正則百官正百官正則萬民
莫敢不一於正而天下治矣此今日之所當講求者
臣先年以言事觸忤張居正居正即欲甘心於臣賴
陛下聖明臣得不死後居正乘臣鄉里私闕移書撫
按欲以中臣致臣於死賴撫按諸臣秉正自持臣又
得不死今臣幸蒙起廢游陟卿秩中夜思惟天恩高
厚凡昔者不死之身皆陛下生成之賜何愛一死
而不勇在圖報以答涓埃之萬一哉今臣雖脫言責

然效忠一念猶不能已語曰大官不言故小官言之
今羣疑積蠹中外臣民無不知其當釋當禁而卒無
有以其事言者得失患於中而積威劫於外如南京
吏科給事中劉一相者固世所稱敢言任事之臣也
而吏部出之爲僉事自一相去而天下益箝口卷舌
矣知之者既憚而不敢不知者又肆而無忌臣而不
言誰敢肯爲臣陛下言者臣感恩圖報鼎鑊不避乃
若名位得喪則已付之度外矣

題別大臣年次品酌定去留以風臣節疏

陳璧

禮科給事中
萬曆十五年十一月

臣伏觀近日章奏兩京卿二大臣有以七十引年及
衰病乞骸骨者間多懇切情見乎詞皆仰荷明旨慰
留槩未得請夫國家之事多得於老成持重之臣而
失於新進喜事之少年茲者 皇上愛惜耆舊任用
老成誠圖治至計臣何容喙顧 臣待罪禮科得以禮
人言 臣七十而引年致政禮之經也三代而下率由
無改豈盡以精神衰憊令得弛負擔息肩於垂老之

年已哉良亦以上足之分咸或當如是進退之間固
人臣之所由以明節耳今大臣之中以衰病引年者
固未必盡然要之其說有肆有分甘恬退性淡聲華
爵祿不入其心嘗決於高蹈遠引以遂其志者上也
有度可而進知難而退量權審勢其於出處去就之
大閑斤斤然繩墨守之惟恐萬一有踰而喪其平生
者又其上也又有年與時馳意與歲去立身行已誠
無可議而自揣其精神力量不能鼓舞恐負任使於
清時者次也其或有年力近衰品格猶存然先曾受

人識彈吹毛而求其疵洗垢而索之癥義不受辱者
又其次矣凡是肆者皆不能久安於位往往期於一
去以明其志蓋亦以大臣進退之義臣子立身之節
當如是已矣夫國無老成人誰與共理 皇上於四
者之中梟狗其請則國空虛固爲不可但暮齡衰態
難於臥治畏譏憂讒紛以生嫌此其爲弊尤不宜因
循歲月者獨不當稍甄別之而量爲去留乎 臣願
皇上由今以始於凡卿貳大臣有以七十引年及衰
病陳乞者除碩德偉望素孚人心朝廷之委任獨隆

而其臣負荷爲特鉅且年雖七十神精未衰義不容
苟去者簡在宸衷特旨勉留外其他委任權力不同
或年果逾例或病非矯飾俱以勅下該部從公覆覈
慎加甄別察其年力才品宜於休致酌議上請許令
致仕一以優耆舊之高年一以全諸臣之末路庶幾
國體臣節兩無虧也或者謂其廢大臣皆採諸輿論
晉用未久不能輒罷臣竊以爲不然夫遺逸諸臣向
當伏居巖穴之時韜光晦跡進不干主知退不飾時
譽皇上一旦嘉擢寵以不次之遷拔茅連茹風聲

所被已足以示天下趨向之路矣向以耄老而殊其
用今以旣老旣病而聽其去刻印銷印總歸無我其
於國是曷嘗有所損耶矧潔謹清修之士在朝固可
廉頑立懦在野亦能振世勵俗歸之林莽使賢士大
夫有所造請而矜式後生小子有所考德而問業則
表正鄉閭未必於盛時治化無少補焉爾天何取於
窮其力斃其身而後已也 皇上誠擇其年力已衰
而品最賢者禮而去之如漢之於二疏焉旣去之後
而間存逸典間或舉行以示章異則進退義明不惟

大臣之晚節同全而禮教大有臣下有不敦節行廉
恥以事其上者未之有也臣愚不勝惓惓願望之至

上下嫌疑橫生乞申諭以昭臣節疏

趙標

浙江道監察御史
萬曆二十一年六月

臣惟人臣不以名飾相砥礪不顧國家之利害而選
要關葺闢羣枉之門者是爲不忠而無益於國者也
人臣過以名節自矜詡不顧國家之利害而誇張揚
厲招衆多之口者是亦不忠而無益於國者也顧前
之弊多出於愚不肖而後之弊則多出於賢智夫至
於賢智而國家卒不賴其用此臣之所以獻歎太息
而興憐才之嘆者也頃該吏科都給事中員缺吏部

以兵科都給事中許弘綱具疏力辭命下部議及吏部具疏辯列頗干 聖怒賴閣臣申救量示薄罰此蓋起於弘綱一念之引嫌避疑事遂決裂至是從此以往臣展轉反思難於歸結嫌疑之誤國誤人乃如此臣惟弘綱之始辭也豈不以前是科臣以議論不合而去吾固非希冀苟合者吾安得而不辭臣以爲辭之猶可而謾語寄傲深文巧詆旣託志於霄漢之上復銳意於毫芒之內睥睨凌厲之態與駕馭籠絡之術互用而雜施是豈其雄才妙思藻績簇於筆端

良工獨苦抑宦成名立得失橫於胷內金注乃惜耶
夫天下君子小人各有操趨君子立身行已自有法
度欲爲君子不得不抑小人欲扶持正論不得不排
息邪說以弘綱之聰明才識其於時事人品豈不了
然五內而顧辭非所辭讓非所讓是何視已之名節
若掌珠之不可輕毀視朝廷之名位土苴而可輕授
耶是何沾沾自喜縹緲如雲際鶴而又勞勞自營局
促效轅下駒耶且天下人情不甚相遠已處其清人
將誰處其濁已處其察察人將誰處其汶汶此以涉

形迹而去後來者將必復然來者踵故套而辭繼之
者又必復然視紫薇青瑣之司爲納汙藏疾之藪甘
虛位曠官之罪爲博名羶節之階此果公耶私耶有
益於國耶無益於國耶矢爲臣不易涉世實難如我
爲君子而人卽以君子待我以君子之境處我以君
子之事任我明白坦然作一君子則硜硜之士可與
能之唯夫事不如意十常八九措躬於可清可濁之
地行已於多疑多懼之秋而能隨試輒效百折不回
言之鳧不浴而自白蓮出泥而不染乃爲大雅卓爾

不羣嗟嗟朝廷亦何負於人苟有心爲國卽薄宦皆
可表豎汗地翻足明心矧都諫重任冠冕省垣彈壓
百僚主持國是得其志則秉公奉正而行不得其志
則抽身潔迹而去光明正大何嫌何疑而乃視之若
浼畏之如虎而竟爲朝廷貽一難結之事如棼絲也
臣以爲此皆崇辭讓之虛文昧當官之實節成一已
之浮名貽國家之本累正所謂人臣私便身圖而爲
國家謀不忠者也伏乞聖明大加申飭以後再有
踵前弊套者必罪勿貸庶人無擇官而事端可塞矣

然此之言明臣飾也抑末也至如人君所託重而恃力者唯相所分任而責成者唯百官今宰執未敢信皇上百官未敢信宰執上下疑沮何以圖治臣以爲宰臣欲示信於百官不必其用人行政盡與已合第在開誠布公答慰羣情其皇上欲示信於宰執不必虛言糜文曲全體面第在諫聽計從助成德美臣復觀數年以前苦才壅今日殊患才乏前日之人心喜議論今日之人心厭議論蓋亂而思治人情大都卽如頃者輔臣交泰之疏一出大小臣工懽忻鼓舞咸

快心拭目願覩蕩平之盛從前囁嚅何啻冰消霧釋也柰之何前愆方蓋後隙復生補漏中流已屬太晚亡羊岐路何所適從然事體之儘難調停唯今日小隙之容易補復亦唯今日蓋人心至平錙銖不容加減爲今之計急當收拾人心欲得人心急當收錄民譽況今省掖員缺太多一二名流曾居都諫惜其正當驅馳之年永棄麋鹿之壑若下尺一徵書俾之單車就道庶人望旣歸羣議可解與輔臣前日之言正爲一律今日之過可以相準人心之離合聚散關係

於此舉匪渺小是在輔臣極力叩聞 皇上俯心降
札而已如自此外更求別術卽令盡心躊躇不免
勞費講說臣愚睹輿論之沸騰恐因小而掩大幸迷
途之未遠願求是以懲非草茅之愚策是廟廊之忠
告耳臣一得之見不識忌諱伏惟 聖明裁擇

主德日昭臣職宜恪疏

汪若霖

戶科給事中

萬曆三十四年正月

臣最駑下冒列諫垣伏睹聖明在上乘陽佈令與物
司熙行善如流剔弊若掃九重之內毅然澄斷如日
月中天自古帝王令德永圖曠然未有者矣顧皇
上宵旰自勤而臣下悠悠莫肯夙夜非忠也皇上
灑濯以待而臣下因仍不精白以承休非義也俗流
寔失其初情勝遂乘其便人各幾倖事每叢疵有君
無臣之世臣竊痛之臣戶垣也宜問天下登耗損益

之數而大學絜矩爲政則理財用人實相經緯敢疏
其槩惟聖明裁察一曰恤民則課吏宜嚴頃者 皇
上停征肆赦蕩然與天下更始至仁也 臣竊謂上實
有澤而下不必究也夫天下非無循良之吏如龔黃
其人也然而名實有不相應者矣棘催科而勸課則
蕭修文法而愷悌則薄甚之則虐焰張矣夫朝廷用
一財必經會計焉黷吏者直恣谿谿壑耳不問鬻妻賣
子也朝廷刑一人必加評伏焉驚吏者直用鍛鍊耳
不聞坐諸嘉石也迨夫雜流賤秩去民逾近朘民逾

深坐嬰兒於虎狼之側無不盡者夫監司者糾令守者也法非盡行也相暱相伺乃有付之不知者矣卽知而不盡以聞之撫按也聞之撫按矣又未必一一露章彈也且夫犯賊法以千百計人無辜而死者累累矣然而率從量調重之乃得廢斥耳間有奉旨問者又轉展而釋去耳彼沈寃幽壑之氓安有重繭而叩闕下者哉盜起亂滋誰執其咎而監司者方且人薦人升罕聞黑白地如傳舍官類飄蓬將焉賴之且夫綉衣直指之使風行雷動實儼天威奈何令其左

右易而以免代行簡書之不尊奸瑕之緣起則必自此矣故紀綱必張德澤乃降若吏貪酷宜追比如律間擇一二監司以示激揚民其有寧乎昔人有言詔書掛壁奸吏到門臣正爲皇上今日浩蕩之恩不可負也一曰制用則經費宜審頃者皇上酌盈濟臣虛與部臣持籌而議至核矣竊謂守財之妬而不察其變終貧困也今天下獨苦邊餉爾太倉歲入四百萬而竭蹶輸九塞以爲常非制也國初倚民屯矣偶告急則議京運未有放濫如今日者也夫烽火非

數警也影占逃亡之數不甚夥也不可清乎民屯宿
逋與夫地荒蕪而不治者不可問乎迺餉臣常以節
括報功矣不可以其數相抵論乎類造虛章何關實
筆走取國家膏血外啖虜而內媚要津貴人以飾歡
育京營十萬詭冒單虛安可窮詰不謂國家以全力
注封疆翻成積弊也河上之役幾同塞下頻年壁馬
焚然動經百萬今黽勉輻輳又八十萬民間調發更
不笑此非可數數常試也語云不大費者不永寧不
知朱旺口可保百年無事否夫漢天子不能具鈞駟

以爲詘豈有皇皇帝廷蕭然環睹而可姑寢閣者
千萬之溢估可更諸厥之滯材可問仍以浮稅半資
加鳩僞焉漸之歲月何爲而不成且夫一役之興內
外胥隸張口待飽商人匠卒乘而爲奸蓋以資量工
十不能五此何例何梗不可劃然剗刷也天下捉衿
磨扇之日人臣隨其所在固宜愛惜以費成節因節
求生如蘇軾所謂毫釐而往莫不有益安得避怨襲
謬以一旦吳支之患遺君父哉天下事患不能任
耳趙充國金城便宜一再上而竟得奏功陶侃竹頭

木屑綜理不遺古人夫畧如此何可諉也二曰任官
則儉濫宜有頃者皇主簡用臣工惟日不足則恢
乎翕受敷施有受臣竊謂今之匿瑕而冒寵者當自
卹也夫在人與嬖幸殊懸巨點與老成易溷方今內
外大臣豈無重乎計與稔違公評而尚雍容在位者
朝廷取資夫固有禮矣卽有斥摘不遽譴呵亦曰堯
之於鯀將姑試也奈何猥自顧迷乎夫大臣者亦知
隸恩之不可終徼也不能不彌縫以曲飭之而又終
怵於衆正之莫收也未能不廣邪類以陰固之旣狐

媚而兎營益鴟張而虎負高官大爵傲然據以爲藏
身之窟而世俗悠悠方且姑息相蒙轉增華靡此何
可以風天下也唐德宗以不覺盧杞爲恨宋臣夏竦
斥而百官庶民莫不相賀豈細故哉夫國家不愆延
賞以報功臣其非常耳乃今循例虛張罔稽實效渺
自子爛羊賤錦衣承敝袴至有挾貲而崛起者可
爲愕然且夫以貲入官非國家之利也年來用訕例
紛人競奔篤旣梗銓路亦穢世風夫小民一金至權
皮骨豪人富屋視巨萬如癰疣耳乃今日白丁明日

青綬流品淆溷奸慝蓋藏朝廷曾憑藉幾何而令其
持券負債滋妬無窮也夫用人如汲水然濁浪不淨
則清源不決謂大臣有曾經公劾自慚物望者亟
去避賢者路是後主爵不得列推而邊功宜核
開納宜裁則聖人所以惜繁纓之故也一曰廣言則
直氣宜振頃者皇上亟補臺諫諸臣卽闢門建鐸
不加勸矣臣竊謂今不昌言以報皇上者大負
也夫六科末三道實非崇也然職司封駁義重糾彈
請劔埋輪肅清中外其誰干之年來時當齟齬人伺

淺深一有指斥輒恣囂辯而言者當受其偏輕之勢
此何體也夫白簡奏事例許風聞將折奸於未萌亦
銷彙於友張豈備兩造之紛紛哉卽事偶覆盆尤當
席藁安得肆焉反辱甚且詬詆之又甚且詛咒之諫
言雖卑與宰相等夷以皇上實耳目之而授之言矣
非但此乎是何太無人臣禮也夫是猶請自上裁者
也若謾詞得詆搆揭報章迹類匿名術同射影置之
則梟聲已仰按之則鼠首無端公托朝廷行其閃爍
此何法也蓋有黠吏制上官流言撼風紀旁猜橫議

無翼而飛朝廷是非之權番若在下倒持若此何怪
大猾之縱容乎歐陽修有言諫天子則易言大臣則
難其機如此可爲扼腕願自今天下公議一歸臺諫
歲下舉者有罰卽例推之典時宜振飭而大臣被
劾一聽宸斷苟非公事不得辯言以傷國體此所以
重朝廷而肅威福之大柄也臣草野迂狂不識時務
謬謂天下盛衰之勢泰否之機隱括如此皇上遠
照穆清斷然不惑力回世運實迂天庥惟是獨運爲
勞久敝宜振天下豈無刻意制節之臣而已竭之日

徒節何補天下豈無小心守法之臣而已敝之法卽
守益勞清議不行賢不肖相質天下大勢如人患痿
元首自強而耳目手足相視莫起可爲太息春秋紀
年以元本仁施義賞罰惟嚴而復以調元責之宰相
周宣王蹶然中興之業實藉仲甫詩曰肅肅王命仲
甫甫崇之邦國若否仲山甫明之夫古今人豈相遠
哉伏乞以明睿斷特諭二三輔弼祇令共之大義
察時勢之所極提領振綱鉉然肇豈天下黎庶如何
常康國家物力如何常足中外臣鄰何以甄別激勸

俾無異議仍嚴勅部院諸臣各靖乃心以率厥屬要在釐奸舉墜一稟舊章使四海之內醇固精明邪氣不作皇二高拱而競祖宗無疆之烈豈不偉哉正始和正萬物發陽之會一王布象之初懇惟

聖明留意

臣工積弊醞釀多端乞申飭以保治安疏

臣邦耀

戶科給事中
萬曆三十四年正月

臣觀之書曰石克艱厥后卽繼之曰臣克艱厥臣元
月戎卽繼之曰股肱良哉蓋后之所以爲后者主
於操操者秉威福以獨斷功罪昭然而不可欺則元
首明而百工有所稟令臣之所以爲臣者主於守守
者盡職掌以分勞典章確然而不敢亂則股肱良而
一人可以無爲我皇上負不世出之資具大有爲
之畧原自可以上追堯舜下邁禹湯茲者值元孫誕

育之期 聖母崇號之際嘉謨無待於人告宸斷特
出以推行補臺諫之缺則闢門之典也甦冤滯之獄
則解網之恩也罷無用之開採則投珠抵璧之風也
真可謂克艱厥后矣而克艱厥臣者尚泄泄然未見
其盡真可謂元首明矣而股肱良者尚茫茫然未見
其以臣不克艱則后獨任其勞而令共之誼廢股肱
不良則元首獨受其弊而叢脞之患生臣請以向來
積蠹之因與今日祛蠹之策爲 皇上畧陳之惟聖
明垂聽焉 一曰法絕陵夷法者天地可與並立列聖

之所申明臣工以此爲功罪之衡皇上以此爲賞
罰之案顧小臣止司一法之職務曠官者得以據職
而糾邪大吏負握萬法之機權徇私者多至乘機而
爲兩份更喜爭而亂政固以撓法而法窮曲順人情
以爲常亦以不盡法而爲敝今日紛更喜事者雖少
曲順人情者頗多輔臣擬旨必下部院之議以爲公
而實欲分其責部院議覆又藉撫按之勘以爲據而
因以相其機大者如此小者何獨不然近者如此遠
者何獨不然徘徊於歲月之間授受於文移之內掩

藏粉飾何所不同久而兩請上裁終是含糊了事若
遇事復決裂又勞聖慮焦思揆厥所元賞罰不斷若
盡法者必賞撓法者必罰授意者不許開調停之路
受事者不許起規詭之門勘議不當卽坐勘議者題
署不的卽坐題覆者任人者責之更重職近者罪之
所則公令昭而事權一入皆精白以事上矣一曰
人才操雜六之生才原爲世用若其無用何取於才
才而真也卽一絲半粟之微能亦裨實濟才而不實
也縱掀天揭地之美譽也是浮名近者流品之擇不

精真偽之途易混賢者無異於不肖不肖者無以異
於賢弊冠垢服以爲高而未必其明於大體揮霍大
言以爲任口不必其確有成謀俯仰周旋隨機便發
一爲通矣而通於酬酢者或窒於當官深匿韜晦緘
口寡言見爲密矣而密於持祿者或踈於習政平居
畫諾猶可通譽而苟容有事助勦必至周章而失據
臣以爲莫若以其人責其事以其事責其功司銓衡
者則視其黜陟之公司錢穀者則稽其出納之當司
典禮者則考其損益之正司兵戎者則核其簡練之

精司刑法者則察其兩造之孚司水土者則審其四
民之利待之各適其分用之必盡其才實心任事者
見庸虛辭餘聽者不錄則人各爭於其職而朝廷得
真才之用矣一曰名器濫觴書曰官不及私昵惟其
公爵罔及惡德惟其賢大私昵豈必皆朋黨比周隱
其才地非才似舊章未合物望未孚便是私昵而官
惡德而爵揆之今日此實厲階高廬清華之班蘊崇
穢惡金吾保傳之秩習長姦欺牛驥同皂薰蕕共器

遂使英才短氣豪傑灰心冒得者雖自以爲榮有志者實羞與爲伍況錫予不重則名器反爲之輕名器旣輕則朝廷亦因而不重臣以爲莫若持慎重之典上先倖之門德懋者斯懋之官功懋者斯懋之賞則馬臣之柄操之自上而人知所勸懲矣一日士風頽靡人止一精神不盡於官常必圖其私使人孰無交友不引進采正必湊集乎邪若今日之養交乃將來之大害座主之止復有座主門生之外復有門生分黨與不念朝廷戀崇官不顧廉恥或露正直之概於

僚屬而輒熟於要津或恃營窟之固於深交而誹詆
乎諫職頻顧已墮之甕則不難犯上言德政之條與
燃已寒之灰則不難受貲郎納粟之誚將來必至計
典可以逞臆而廢要地可以引例而求迄今不匡竟
何底止聖心洞照必所鑒知大小臣工亟宜嚴勅如
不_一其下背公植私敗檢營官決閑希進將朝廷
官秩做自己人情毀自己官常受他人請託者容_臣
等指名叅奏按國法重處無使盜名盜位之徒得藏
奸而漏網則比德之風泯而惟皇作極之化成矣四

者在臣下爲牢不可破之病在廟堂爲必不可緩之
圖機括在輔臣必任怨捐私斯可祛因循之習事宜
在部院無門例破法遂至扇苟且之風同寅協恭一
心一德分猷共念濟濟師師何憂咸熙之績不成而
太平之業不奏也若徒望皇上之宵旰圖維鉅細
經慮而臣工乃高談坐視虛竊寵榮豈爲后者當任
其艱而爲臣者當享其易哉豈率作興事獨責之元
首而慎乃憲顧不屬之股肱哉區區末議仰贊聖
明懇祈採納施行世道幸甚宗社幸甚

聖政維新臣職宜舉疏

王基洪

江西道御史
萬曆三十四年正月

臣

以蓬藿臣王濫竽仕籍三年作養二年候補竊見

文事日非民生漸促人心搖惑士氣銷靡臣謂天下

事從此蓋不可知矣不謂天啓聖衷一旦幡然悉更

弊政永新令圖閭閻有擊壤之歌士類有彈冠之慶

此社稷無疆之休聖明不朽之業臣卽叨受新命予

以言責亦惟仰贊盛美共歌太平何敢掇拾浮言塵

瀆聖聽顧君有美而不能將順者非忠臣有懷而不

能獻納者亦非忠臣之區區以爲更新之道固在拔
本塞源尤當改絃易轍今有事勢扭於積習人情安
若固常日甚一日將至決裂其釀成之原蓋在下而
不在上而轉移之機則在上而不在下敢竭愚衷臚
引上請亦泰山之土壤河海之細流也惟聖明垂察
未一曰賢才之當辨臣聞聖主之功在於得人得
人之術在於知人伊尹曰王者得賢才以輔然後治
臯陶曰知人則哲能安民蓋國家之運非泰則否而
人品非正則邪邪正之用舍國運隨之昔唐憲宗問

開元時則治天寶時則亂何一君而相反耶李絳對以玄宗初任用姚崇宋璟勵精圖治左右前後皆正人也及林甫國忠得君專引奸邪分總要劇於是

不聞直言內則監臣誘以興利外則武夫誘以開邊此開元天寶治亂之由也蓋用一君子則衆君子進而相與成其功用一小人則衆小人進而相與煽其禍然君子每難進而易退小人則易進而難退君子第一心爲國甘犯顏色觸忌諱皆所時有且寡援也小人專以窺覷爲精神以結納爲深計排逐異已

引用奸邪百計彌縫莫測其端故林甫之奸人皆知之而玄宗方欲高居委以政事盧杞之奸人皆知之而德宗方以爲忠清強介更有一種未形之惡垢衣敝履依門傍戶外示清介內實依阿呼朋引類將至司升此山濤所謂誤天下蒼生必此人蘇洵所謂其言不可勝言者也方今聖政更新內外臣工必且洗心滌慮仰贊聖明臣亦何敢泥其往事逆其將來惟是嫫母利於昏鑑盜賊惡夫皎月恐大明當天而豐蔀尚在潛滋暗長後不可知此人才消長之會世道

治忽之闕蓋左右已多煬灶之奸奸邪更饒要君之術所爲撤障蔽而折邪萌者恃有皇上之明斷昔齊威王以左右之毀而封卽墨以左右之譽而烹阿大夫是以皇上而見不及此哉此臣謂賢奸之當熟也其二曰名實之當稽祖宗創制設法立綱陳紀有是實而後有是名未有有其名而無其實者也乃昔之爲政也緣實以成名今之爲政也徇名而忘實吏部職在用人名爲銓部欲其平也繁簡難易一聽之掣簽已非量才授任之意乃今之掣簽亦成故

事矣掩耳盜鈴未先示人以詐亦何以責其實心實
政之效哉至循資而用舉貢無華臚之階計日而遷
榮高惟時日之待殿最賢否漸覺混淆非所以爲勸
也拊循士卒將帥之任簡任將帥司馬之職乃大將
而值至半萬其副總兵叅將遊擊而下率以秩之崇
人地之豐瘠爲定貲矣予者不以爲惠受者不以爲
貪較量權衡爭同商賈卽有志如良平勇如頗牧非
是物也不得望遷無論講習簡練頗成故事試自京
營以及邊塞按藉而稽其部位之衆果能十得其七

否也漕河之役功罪不問大工之役貂璫是參水衡
之金錢傾倒無餘司農之外藏搜括殆盡以天下有
限之才填此無窮之壑悠焉游焉何所底止此臣之
為大懼也諸如此弊亦每申飭未見奉行人情便
於利已習俗視為泛常卽有一二實心任事之人甫
見更張已自騰沸蓋昔以法而制情今則以情而抑
法康澄所謂上下相徇深可畏廉恥道喪深可畏者
此也此臣謂名之當稽也其三曰賞罰之宜慎夫賞
罰者人主礪世磨鈍之大權也唐陸贄曰立國之道

惟義與權誘人之方惟名與利孔子曰惟名與器不
可以假人若是乎名器之爲重也今日賞罰失其則
矣而邊功尤其濫觴者蓋近日邊事惟務彌縫罔臻
實效掩敗以爲功彰一以成百自東征南討每事調
停恩寵濫加人懷僥倖於是上下相蒙中外相濟機
一成牢不可破金吾世胄纍纍若若日積月累秩
躋公侯夫六臣受國厚恩身躋崇階富貴已極乃上
不畏天道惡盈之禍下不羞路人負乘之譏使統袴
黃口坐擁金紫豈蔽袴以待有功之意哉以非常之

典等爲尋常之用則人不知榮以有功之人僅同無
功之賞則人不知恩至於不知榮不知恩則亦不知
畏朝廷激切之典不幾乎窮哉近又見科臣陳尚象
論資以勛征番之役兵部以此言其功吏部以此復
其職夫尚象原未同朝臣不知其素履第聞其以建
言去位則亦骨鯁者流也輸資助兵亦自急公之義
豈遂階之以求進朝廷用人自有黜陟之大典士人
處已自有進退之太節若以建言賜環自是堂堂正
正何以利爲捷徑得無令不肖者襲其迹而生心賢

者觀其效而懲念乎其所關係世道人心良非細故
此臣謂賞罰之當慎也其四曰言路之當開夫言路
之通塞係國家之治亂言者所以防壅蔽而遏邪萌
也昔有諫鼓求謗之陳鐘磬鞀鐸之設至漢則求言
之詔無日不下宋則開言路之疏無日不上我聖
祖一切利病許諸人直言是聽原不棄於芻蕘
當言則言言言尊在於有位邇年以來災異頻仍至歷
聖慮脩省實政間至再三而該部條陳止以青衣角
帶苟且塞責乃求言一節卒不取焉說者謂其箝人

中以媚執政良爲可恨至臺諫則有言責矣掃門者
既甘於黷太之吹扼腕者有鑒於仗馬之鳴奸黨日
熾讜論罕聞夫始皇之威諫諍而死者二十七人而
李斯猶挺身以就鑊今皇上有包荒之度大臣無
茹鹿之奸而敢言之氣顧獨讓於叔世者豈古今之
人如是其不相及哉蓋古之死者雖不得其言猶得
其名今之去泯泯默默莫知其端如白瑜之以其泯
也而去王士騏之以文諷也而去借事中傷捷如桴
鼓天下之人覩此光景其誰不寒心而消萎哉臣觀

今之進言者指及乘輿者十常八九言及執政者十
無二三則言執政忌自難其人矣乃言 皇上者毋
荷優容言執政者必遭擯斥人懷畏懼簡默成風使
天下之人敢於言 皇上而不敢於言執政卽有大
奸大惡 皇上亦何從而知之宋蘇軾有云奸臣之
奸以臺諫折之而有餘及其旣成以干戈取之而
不足又曰養猫所以捕鼠不可以無鼠而養不捕之
猫畜犬所以防奸不可以無奸而蓄不吠之犬則言
路固 皇上之耳目也可自蔽塞哉臣又有說焉邇

來章奏大半留中人遂有疑其中格者聖鑒昭然萬
無此理而臣以爲欲解衆庶之疑當立共見之法合
無令六科給事中日輪一員侍文華門將一日奏章
開列珠語總列一疏至晚奏上庶乎中外不隔人疑
漸釋而亦可以防壅蔽之患矣此臣謂言路之當開
也方今萬事俱弛衆志未肅新沐者彈冠新浴者振
衣機在廟堂間不容緩而善人者天地之紀政之
所由孔子所謂爲政在人孟子所謂急先務者蓋得
其人則名實核矣賞罰當矣言路通矣不得其人則

名實消矣賞罰濫矣言路塞矣此又端本澄源提綱挈領之道惟願皇上垂神採納焉

聖政光輔在人臣節砥礪宜急疏

沈鳳翔

戶科給事中
萬曆三十四年正月

臣至謫劣猥蒙主上以縣令拔置諫垣蓋明以言責
予臣令天下事悉得直陳無諱其有槩於衷久矣幸
際聖明轉圜之會闡澤旁流羣心遐望海內外顒顒
然咸謂太平指日而國運丕昌也微臣揚勵不暇敢
伏妄塵天聽哉惟是有君無臣自昔歎之至於今臣
節多乖無能佐明主以終堯舜之治爲可痛也夫所
謂節者非斤斤抱咫尺而不一適於用之謂也良心

具在世道攸關律其身於禮義廉恥之中而淡其志
於功名富貴之外一介獨嚴九鼎可任乃足術耳夷
考先正立朝丰采凝峻令人跬步無敢越軼而或偶
聞人言則不計及言者之當否也曰我實望輕以招
侮席藁引退蓋不退不已故一出一處爲世羽儀風
起頑懦勛垂竹帛斯各自完其節而朝廷益尊數年
以來巧宦蠅營真心狼狽小臣姑亡論所號大僚鉅
卿爲天子改容而託重者曷宜繆自涼菲然而視先
正遠矣其有笑罵自由儼然簪紱固爲頑頓之極亦

有居恒雌伏善匿下其身至不敢鴈行於平交而甫
經彈射慚忿乘之工簧舌以覆敗端肆詬詈以制羣
吻或詭而昌詞乞勘又詭而堅臥希留此其人可知
矣孔子所爲嚴患失於鄙夫而發隱恥於穀祿也頃
接邸報見兵部尚書蕭大亨力求休致庶幾止足之
義職竊躓之皇上優禮耆舊曲全晚節當必自出
宸斷遂彼素心不令其復滋多口者獨計珠池寶井
之爲滇粵患匪朝夕故矣皇上下詔封閉加與更
始卽古投珠抵璧何以尚茲斯蓋出阽危而衽席之

誠大惠也昔武烈稱兢不獨其却貢懷遠之爲兢兢
飛廉惡來輩並日而殛故百姓用寧而垂拱以治今
督兩廣撫滇雲爲皇上子惠元元者非戴燿陳用
賓乎滇粵之間大寇雖殲諸蠻叢釁非所爲厯宵旰
而號難馴者乎戴燿以鍾鳴漏盡之年爲全身保家
之計往事不敢掇矣近且膽落於中消之覺察而膠
漆日深心折於三司之解和而彈壓無主百粵之民
奚賴焉至滇中孤懸天末夷夏雜處卽得廉明果毅
之臣正已率屬猶懼不能丕彰威德立起瘡痍乃用

賓貪功冒賞括衆肥資計典旣逃滿志肆溢夫民間
側目搬運猶曰道路哭耳毋逼也而訝運者之踵
至也曰此夫豈以是爲百年殉身之而累累若是吾
老矣倘執手相訣亦子情也用賓雖曾具疏乞休然
時時開門人人納賄此豈陳情者所爲蓋絕裾之意
多嚮羶之計孰不知有母安知有君欲精白乃心戮
力王室必不得之數矣國家於若輩豈有愛焉而俾
建牙一方魚肉靡爛於無窮也如皇皇上投珠抵璧
之政何蓋穢聲久著民怨蠶生信無如此兩臣者治

去太甚庶足惕真心於不死挽頽俗於將墜卽有稍
稍不檢者必將悚志三尺漸歸於正臣等亦得相安
於無言而不然者憑城營窟將操勝於粵援染指濫
觴益潰坊於破甕轉相窺覘摹倣靡窮世道人心江
河日下豈不深可慮哉故臣特以臣節一語激發其
本心之良令之自艾自奮以希蹤先哲佐聖政而代
有終耳伏願皇上超然遠覽斷然必行如兩臣者
亟賜罷斥顯示明旨於天下惟在篤意愛民力清仕
路其有踵習前弊不難以身爲的者容臣等白簡從

事逐鷹鷂而遠之則廉恥道倡人心兢勸所爲裨益
新政而奠萬年不拔之業將在是矣

主上新政日隆臣下積弊未革疏

蕭淳

浙江道御史
萬曆三十四年正月

臣聞君爲元首臣爲股肱是一體之義君與臣共成之者也而君曰克艱臣曰不易是交儆之道君與臣分任之者也乃詩稱百爾君子無恒安處靖共爾位正直是與則所以責備於臣者爲尤重焉邇自我皇上深宮久攝內外大小臣工雖佇望太平然無不以袞闕之難補圖轉之無日爲謝過地茲者天啓宸衷發德音下明詔曠然與天下更始則諸臣日所

藉口爲掣肘者一旦悉得之於皇上而其於小旻
靖共正直之義可不知所以自盡乎臣曩待選都門
數年於茲竊見我皇上自靜攝以來默運之主宰
操自深居雖無旁落之漸制馭之綱紀墮於積習每
多偷怠之愆臣感時觸事有概於中久矣謹以其得
於聞見切於時事者條爲五言冒昧具陳願皇上
試垂聽焉一曰勵廉恥以風世俗臣聞世道之壞則
人心爲之故廟廊有公道事士大夫有廉恥心兩者
固相爲維持然公道在廟廊之主持或有時格而不

行廉恥在士大夫之葆任宜畢世守而勿失乃近者
士大夫至有託公道之不能行而輕去其廉恥心者
則世道幾何不從此壞哉大臣以偃僂周密爲謙光
曲收違道之譽小臣以奔走倚托爲能事多犯非公
之謂升轉不計俸資遷改不從衆望失之者資口舌
以騰議得之者逞顏色以驕人初猶以倖得爲難久
之物而暫嘗之今且以倖得者之微惠於多援而攘
袂先之矣初猶以虧負爲受憐之具而姑就之今且
以虧負者之終棄於寡黨而掉臂去之矣尚通醜固

寡廉鮮恥釋今不挽後將何極臣愚以爲宜教大臣
以端教小臣以靜聞望宜採而必求其實資俸宜定
而不徇其情必使天下士大夫曉然知廉恥之心原
不因時勢爲存亡而寧見罪於時人毋得罪於清議
則人心一正世道可挽而登之淳熙矣二曰明是非
以息爭端臣聞是非之數如言黑白計一二非難辨
也是非定而後功罪明功罪明而後賞罰當賞罰當
而後趨向審所係固不重哉乃近者是非之實多淆
而賞罰之興遂紊此其弊不在是非之難明而在是

是非非者之有所怯而不敢任臆而不忍割耳小臣
乏和衷之風而一語相激遂成必報之讎大臣避衆
射之地而兩質相當竟多調停之術強者與弱者爭
則故抑弱者覆盆何以見天強者與強者爭則並許
強者首鼠何以歸一意在留所愛而懼素嫉所愛者
之挾以爲談資也則兩存之矣意在去所憎而懼素
附所憎者之畜以爲釁端也則兩損之矣聚訟者不
難瞋目語難持衡者惟在笑臉求平臣愚以爲宜教
大臣以任教小臣以和以公論付之天下惴惴何爲

以至協乎人心。嗷嗷自息。必使天下士大夫曉然知是非之公。原不以強弱爲假借。寧處弱而履。是毋得強而蹈非。則公道一明。朝紳可羣而進之。協恭矣。

三曰禁私揭。以杜報復。竊照內外臣工。六年有察三年。有覲。內則有科道。以司糾彈。外則有撫按。以行舉劾。耳目極密。聞見極真。信足憑也。乃近來有不由科道開訪。撫按造報。而私揭中傷之者。造無根之謗。則善類多重足之危。納有隙之謀。則強徒施反噬之計。臣非謂撫按科道必能周知天下之情。僞而置銓衡。

于拱手也但以耳目之寄宜確不宜多黜陟之典欲
當不欲刻矧朝覲屆期外察在邇臣默以爲凡遇計
吏一以部院科道撫按所開爲主而一切私揭置而
不問勿因鄉里親族之造言而入人以不可解之罪
勿信權要嫉妬之浮說而使人有不能白之冤勿風
聞帷薄曖昧而遂玷其室家勿摘舉細微鄙褻而遂
畧其大節庶名實不至於混淆是非不至於倒置進
退允協而忠厚亦存矣四曰酌籤選以存大體竊照
銓曹之職在程量人牙而器使之或以身言書判據

見在爲公案或以文章政事採物望爲權衡未有舉
至重至要之典止付之一籤者蓋籤選之設凡以絕
吏書之邪移雜流之鑽刺倘亦變結繩爲書契不得
已而用之未爲非是乃近者則陽以抽籤示公陰以
坐籤徇私以竹片爲圭爵誠苦古聖知人之難並籤
法又失真重非昔人坊世之意臣愚以爲自知縣以
上宜憑部選先論道路之遠近以省津途之勞次論
人地之相宜以求職業之舉其自知縣以下凡州縣
佐貳雜職等官流品旣多奸弊易滋仍宜抽籤以公

選法照依原派省分各地各爲一棹參以應得職銜
二行共爲一箇信手援取報名書記庶澄叙旣當而
鑽求亦革矣丑曰議開納以清仕路竊照賣官鬻爵
盛世恥談貨進貨取志士不屑乃朝廷有難已之役
勢必借資於富民諸生有難致之身情愿借途於輸
助開納亦自有必不可廢者近因河工一例加至運
付銓曹業已疏罷各官堅欲舉行大夫崇秩遂爾濫
竊然此固爲名器惜也他如丞尉之流皆有民社之
寄以數金爲璧馬巧施假道之謀以百姓爲外府肆

行盈橐之計有納止百餘金而俸則六七十金者以子母權之官家亦甚拙矣臣愚以爲凡遇大工開納除監儒吏承等類照舊外宜另設一清散之職以待貲郎而稍優之體厚加其值量給以常俸三分之一勅所在有司不得無故窘之富室子弟數奇制科業精柔翰思得一官以圖結局者則雖所輸甚費所得甚約未有不樂趨之者也且其無多俸祿則不必限之以員不當事任則不必需之以次無礙銓選則不必時開而時止官階別設一局永作招徠輸資別貯

一所專供支用其一切刑名錢穀之官雖小必慎盡
宜停止庶工役有賴而銓法亦正矣以上數款皆

臣

目擊其艱心知其弊所爲昕夕扼腕而不平者今幸

遇我皇上聖政一新天人胥悅不於止輦之日亟

爲補牘之謀非

臣

之生平所自誓也然

臣

聞法之立

也非上之人操之以必然之畫則朝更暮易必至廢

閣而不行非上之人主之以無我之心則甲可乙否

率多齟齬而不合總之玩愒矜戾所從來矣伏乞勅

下部院酌議如果

臣

言不謬俯加採擇施行其一切

委細時弊有臣愚條議未及者更望皇上戒諭羣
工務在各靖乃心永肩一志興利必盡其術除害必
絕其根不必自簡之及而始僅僅塞其故事漫然應
以具文斯臣之所惓惓於今日者也

撫按責任至重交代之例當嚴正郎印務攸關
出差大非政體疏

翁憲祥

吏科右給事
萬曆三十五年正月

臣惟人臣所不容越者明例所不容曠者職守束於
例域於職誼難自遂不意邇來縱弛成習臣子率意
任情日甚一日弗可止也有如藩臬大吏每每無端
擅離地方弁髦法紀屢經條議申明有犯定當嚴治
無容復贅乃臣竊又有扼腕者御史職司風紀彈壓
一方察吏安民不可暫缺舊例巡方之使必新舊交

代方始出境近年以來往往未代輒行初猶以爲駭聞既遂習爲故事目今各差滿正多得無復有踵而行者乎國家之事總於六曹分於各署署有正郎職專印務于係匪輕舊例惟刑部十三司郎中五年一差審錄蓋以欽恤大典特重其事其他更不聞有正郎差者近來此典不甚依舊恤刑多屬主政乃見各部正郎每借別差紛紛四出卽一年之內指不勝屈矣得無遂相沿而不改乎各處撫臣封疆寄重交代之例開載會典尤極森嚴數十年間尚幸遵守而近

忽有江西巡撫許弘綱之事見任廣西巡撫楊芳又
疏請免代矣得無此例復將決裂乎夫按差不相接
則中間曠缺之日誰與資彈壓而肅紀綱部司無掌
印則雖有代署之官未免多推諉而滋玩縱撫臣倏
起徑歸之例則將來相繼自由孰爲捍封疆而備緩
急此皆今日敝風太宜振刷無得因循遷就者而說
者每曲爲解曰往時按差一年一代今台使如晨星
矣按差瓜期再更不獲代矣予身勞瘁弛擔無時卽
有不代而去須從寬宥也故雖問一題叅聊以塞白

而從無顯罰往時郎署俸及卽轉今推轉久滯矣部
郎俸踰數載不得調矣一官株守河清難俟卽無出
差之例須與通融也故有一陳乞堂官漫不主持必
唯唯聽從往時督撫遇缺卽補今簡用甚難矣先後
遭艱如撫臣王象乾等候輒一二年久矣方寸已亂
進退觸藩若許弘綱之遽歸亦或有懲於往事急不
暇擇也萬一重原其情猶可及於寬政而無爲奇責
總之近年事體惟風憲乏人陞除太壅是以各官所
處均有不得已之情是以部院持議常有不盡之法

然而法一以情奪寃將情勝而法亡江河之趨流而
不返國家又何所憑以制馭臣下震肅人心乎此其
關係良非細故胡可動云姑息不早隄防也臣竊謂
臣子業委質朝廷身非已有矣居官者縱值萬分苦
情而有明例在有職守在無可柰何只須苦一身以
守朝廷之法持論者縱各官有萬分苦情而繩以明
例責以職守何說之辭只須借三人以存朝廷之法
大臣以爲自今以後按臣有不候代者必當叅治也正
郎之乞差者必當禁止也見在擅離任之撫臣必不

可不議懲而乞免代之撫臣必不可不嚴諭也惟在天詔丁寧亟下部院一一振飭庶於法紀重有裨焉乃區區朴忠又有所願於皇上者尤望速俞部院屢請舉行考選之典以充台省員缺俾各差更替有人命部郎俟俸陞轉原非異擢每疏必賜允行使各部司屬不至意氣消靡希圖苟且息肩隳廢部事自今江西撫臣業經會推乞卽點用俾尅期蒞任以重封疆此後撫臣員缺必隨推隨點毋使奄奄候代稱不堪也則大小臣工益無得藉口以求自便者蓋

不靳授人以官乃可令人人各勤於官不使臣下有
不申之情正以使朝廷無不行之法也 皇上英明
天縱第在轉移間夫何難哉 臣待罪該科感事激衷
冒昧陳瀆伏惟 聖明留神省覽